

Namminersorlutik Oqartussat suliffeqarfutaasa nammineertitat naatsorsuusiortarnerat pillugu Namminersorlutik Oqartussat nalunaarutaat

Inatsisartut inatsisaanni nr. 26 novembarip 28-anni 2016-imeersumi kommunit Namminersorlutillu Oqartussat missingersuutatt naatsorsuutaallu pillugit § 36 naapertorlugu makku aalajangersarneqarput:

Kapitali 1

Atuuffia

§ 1. Nalunaarut manna Namminersorlutik Oqartussat suliffeqarfutaannut nammineertitanut ukununga taamaallaat atuuppoq Nukissiorfiit, Mittarfeqarfiit aamma Asiaq.

Imm. 2. Imm. 1-imi suliffeqarfiit taaneqartut ukiumoortumik naatsorsuusiortarnerminni Nunatta Karsiata aningaasaqarnermut ukiua malissavaat.

Kapitali 2

Ukiumoortumik naatsorsuusiortarneq pillugu inatsisimmi aalajangersakkat atortarneri

§ 2. Nukissiorfiit Kalaallit Nunaanni ukiumoortumik naatsorsuusiortarneq pillugu inatsit pillugu peqqussut qaqugukkulluunniit atuuttoq naapertorlugu Sanaartukkat innaallagissamut sakkortuumut atugassat atortullu innaallagiartortut pillugit Inatsisartut peqqussutaat nr. 12, 3. november 1994-imeersumi aammalu Nukissamik pilersuineq pillugu Inatsisartut peqqussutaat nr. 14, 6. november 1997-imeersumi malittarisassat malillugit inuiaqatigiit isiginiarlugit suliffeqarfik Namminersorlutik Oqartussat pigisaattut ingerlanneqartuunerata kingunerisaanik nikingassutit atorlugit ukiumoortumik nalunaarusiortassapput.

§ 3. Mittarfeqarfiit Kalaallit Nunaanni ukiumoortumik naatsorsuusiortarneq pillugu inatsit pillugu peqqussut qaqugukkulluunniit atuuttoq naapertorlugu inuiaqatigiit isiginiarlugit suliffeqarfik Namminersorlutik Oqartussat pigisaattut ingerlanneqartuunerata kingunerisaanik nikingassutit atorlugit ukiumoortumik nalunaarusiortassapput.

§ 4. Asiaq Kalaallit Nunaanni ukiumoortumik naatsorsuusiortarneq pillugu inatsit pillugu peqqussummi qaqugukkulluunniit atuuttumi inuiaqatigiit isiginiarlugit suliffeqarfik Namminersorlutik oqartussat pigisaattut ingerlanneqartuunerata kingunerisaanik nikingassutit atorlugit ukiumoortumik nalunaarusiortassapput.

§ 5. §§ 2-4 naapertorlugit naatsorsuusiortarnermut malittarisassani nikingassutit ukiumoortumik nalunaarusiani naatsorsuusiortaatip atorpeqartup ataani allanneqartassapput.

Kapitali 3

Ukiumoortumik nalunaarutip il.il. avammut saqqummiunneqartarnerat

§ 6. Ukiumoortumik nalunaarusiat Nunap Karsiata naatsorsuutaannut ilaapput.

Imm. 2. Naalakkersuisoqarfiup suliaasaqarfinnik akisussaasup ukiumoortumik nalunaarut Aningaasaqarnermut Akileraartarnermullu Naalakkersuisoqarfimmut nassiuttassavai.

Imm. 3. Ukiumoortumik nalunaarusiaq taassumaluunniit ilaa Naalakkersuisunut saqqummiunneqarsimatinnagit avammut saqqummiunneqartassanngillat.

Imm. 4. Ukiumoortumik nalunaarusiaq Inatsisartunut Nunap Karsiata ukiumut aningaasaqarfiusumut pineqartumut naatsorsuutaat ilanngullugit akuerineqarnissaat siunertaralugu Inatsisartunut saqqummiunneqartassapput.

§ 7. Suliffeqarfik ukiumoortumik nalunaarusiaq tamarmiutillugu saqqummiuppagu, tamanna kukkunersiorneqaranni ilusaat oqaasertaalu atorlugit kukkunersiuinermilu oqaaseqaatit ilanngullugit pissaaq.

Imm. 2. Ukiumoortumik nalunaarusiaq ilaannakortumik saqqummiunnerani, ukiumoortumik nalunaarusiaq naalisarneqarnikoq avammut saqqummiussinermi ersarissumik allaqqassaaq. Kukkunersiuinermi oqaaseqaatit avammut saqqummiussinermi naalisarlugit ilanngunneqartariaqanngillat, kukkunersiuisorli nangaassuteqarsimanersoq avammut saqqummiussinermi ersarissumik allaqqassaaq.

Kapitali 4

Kukkunersuineq

§ 8. Ukiumoortumik naatsorsuutit kukkunersuiisumit naalagaaffimmit akuerisaasumit Inatsisartunit toqqarneqartumit nunap karsiata naatsorsuutaanik kukkunersuiisumit kukkunersiorneqassapput.

Imm. 2. Kukkunersuiisup tamat kukkunersuinermit ileqqugisartagaat naapertorlugit ukiumoortumik naatsorsuutit kukkunersiorneqassavai, tassungalu ilanngullugu suliffeqarfiup naatsorsuusiortarnermi atorui taakkulu imarisaat allat isornartorsuiilluni misissussallugit.

Imm. 3. Kukkunersuiisoq pissutsinik sulinermini ilisimalikkaminik pisortanilu ilaasortat suliffeqarfimmut, Nunap Karsianut, akiitsoqarfinnut sulisunulluunniit kalluaasumik taarsiisussaataaffigilersinnaasaminnik pillarneqaatigisinnaasaminnilluunniit iliuuseqarsimanerannik iliuuseqarsimannginnerinnilluunniit tungavissaqartumik ilimasuuteqarnerminik immikkut paasissutissiisassaaq.

Imm. 4. Kukkunersuiisup Inatsisartut piumasaqaataat inatsisinut imaluunniit kukkunersiuinermi ileqqorissaarnermut akerliunngippata malissavai.

§ 9. Suliffeqarfimmi pisortat paasissutissat suliffeqarfimmik taassumalu ukiumoortumik nalunaarusiaanik naliliinermit pingaaruteqartutut isigineqarsinnaasut kukkunersuiisumut paasissutissiisutigisassavaat.

Imm. 2. Suliffeqarfimmi pisortat kukkunersuiisup pisariaqartutut isigisaanik misissuisinnaatissavaa, isumagissallugulu kukkunersuiisup paasissutissanik pissarsinissaa kukkunersuiisullu suliaminik

ingerlatsinerminut pingaaruteqartutut isigisaanik ikiussallugu.

Imm. 3. Suliffeqarfinni pisortat kukkunersiuinermi allattuivik atsiornermikkut akuerissavaat.

§ 10. Kukkunersiuneq naammassereerpat, kukkunersiuisup ukiumoortumik nalunaarusiamik kukkunersiuisimanini tamassumunngalu pisariaqartunik iliuuseqarsimanini naatsorsuutitut oqaaseqaateqarnermigut uppernarsassavai.

§ 11. Kukkunersiuisoq Inatsisartut atugassaannik kukkunersiuinermi allattuvimmut allattuisassaaq.

§ 12. Kukkunersiuisoq sulisuilu suliffeqarfiup naatsorsuutai pissutsillu allat pillugit susassaqaanngisunut paasissutissiisassanngilaq.

Kapitali 5

Atuutilersitsineq

§ 13. Nalunaarut ulloq 1. januar 2018-imi atuutilersinneqarpoq, takujulli imm. 2.

Imm. 2. § 3-mi aalajangersagaq ulloq 1. januar 2019 atuutilersinneqarpoq

Imm. 3. Namminersornerullutik Oqartussat suliffeqarfiutaasa namminersortitat naatsorsuuseriveqarnerat il.il. pillugit Namminersornerullutik Oqartussat nalunaarutaat nr. 25, 26. november 1998-imeersoq 1. januar 2018-imi atuutilersumik suliffeqarfinnut § 2-mi aamma § 4-mi taaneqartunut atuukkunnaarpoq.

Imm. 4. Namminersornerullutik Oqartussat suliffeqarfiutaasa namminersortitat naatsorsuuseriveqarnerat il.il. pillugit Namminersornerullutik Oqartussat nalunaarutaat nr. 25, 26. november 1998-imeersoq ulloq 1. januar 2019 atorunnaarsinneqarpoq.

Namminersorlutik Oqartussat ulloq 22. december 2017.

Aqqaluaq B. Egede

/

Nikolai S. Christensen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut